

四十、溫氏

興寧溫氏族譜

興寧溫氏族譜，友人溫宗嶠兄，自其兄冠歐手所索出惠借者也。其譜修於民國十七年，主事溫頌庭先生。全譜分目九：一衣冠、二封贈、三耆壽、四文獻、五節孝、六房系、七補遺、八祠宇、九雜錄。而冠以序例、世表、年表、族源、家訓、諸什。其世表，乃先達溫仲和、慕柳先生按唐書宰相世系表及各書，撰述而成。而序言亦載慕柳先生重修溫氏譜序一篇，意此二文，均自松口溫譜所轉錄。蓋興寧溫氏與松口溫氏，其先世皆自福建上杭永定所遷出也。冠歐曩從家嚴治國學多年，余近日在宗嶠兄處，觀其手書，知其於客家研究，頗表同情，茲先節錄其信，亦以誌余對彼之謝忱云爾。其信云：「昨閱吾弟奉父函，欣悉羅君有編纂客史之美舉。此事關係客系甚為重大，凡我客人，如有一得，或舊存長篇短簡，均當寄奉羅君，以備參證。……我族各處譜牒，一時不能全數借觀，茲先寄上最近所修石馬族譜，希轉奉羅君，以備採擇。……至言吾族丁口統計，只可大畧約算，蓋因蕃居星散故也。據余所知，興寧約五千，梅縣約七八千，五華約萬餘，鎮平平遠約一二千，惠屬約二萬人，惠來縣約萬人，其餘遷居各地者，指不勝屈。……其譜所載史實，多與客家源流有關，茲摘其尤重要者，實於此篇。民國二十年三月一日，編者識。」

余考族譜，我溫姓爲唐叔虞後。叔虞者，成王之同母弟，所謂剪桐珪以封弟者，此也。平王東遷後，襄王爲弟叔帶借狄兵所迫，蒙塵於外，晉文勤王，迎君復辟，王以文公勳績，加封陽樊温原攢茅

四邑。又晉悼公以卻至勳在社稷，命食采於溫。後百年，而溫姓始著，此溫族開姓之始也。

然我溫姓發源於山西河南，子孫蕃衍。秦漢之時，偉人雖有，逮東晉五胡亂華，懷愍帝爲劉淵所擄。時劉琨祖逖，聞雞起舞，擊楫渡江，誓復中原。我嶠公爲劉琨記室。晉元帝渡江，建都臨安，嶠公奉琨命，上表勸進，爲王導卜壺諸賢留輔晉帝，而帝亦傾心相與。及後王敦作叛，以其下錢鳳爲謀主，我嶠公還朝，盡以敦謀告帝。及蘇峻作反，我嶠公督江州，邀陶侃，戮力同心，協擒蘇峻。後嶠公遂家居浙江，四十二歲而終。晉帝嘉嶠公忠盡，封爲始安公。而今廣東各處建祠，匾書始安公祠，嶠公爲我南七省開創之肇祖也明甚。文公著紫陽綱目，斷曰：晉朝二百餘年，功臣炳炳，盡忠王室，無瑕可摘，稱純臣者，惟溫太真一人而已。

南省溫姓，由浙而遷江西石城。而石城之銅寶公，移居閩汀寧化縣石壁鄉。其時有德興公，出仕廣東而沒，墓于白雲山。五華溫訓，查確亦嶠公之嫡派，捐金修其墳墓。下四府溫姓，多由所出。寧化宗慶公之裔孫九郎公，初移居上杭安鄉坪，基址洪山堂，地墳在近處，形喝繡針落槽。後因察院經過，誤犯犄角，誠恐遭禍，其子易姓爲林五郎。公遷居永定雙井邊，祖屋仍在，地近仙師宮，形喝弓形彈子穴，其餘畫眉跳架祖墳，在河頭城。杭永以九郎公爲始祖，上杭永定城內，俱建有九郎祠。

我七世小七郎公，家資富有。八世四七郎公，分多貲財，移居上杭藍家渡霞化鄉。生九子，存七房，永祀。地墳在本村，形喝蜘蛛結網形，建有四七郎公祠堂，甚爲整齊，本村施有安仁寺。我九世

良善公，在本村建立有祠，其墓在祠堂後山，形喚飽虎吐肉。藍家渡温姓，三千餘丁，善公裔孫，居其大半。善公子移居石坑，今掛樹蛇形，碑雖善公名諱，其實善公子也，善公特銀牌葬耳。烏鴉落陽范祖妣，真骸也。考藍家渡善公祠神主牌，善公配范黎二妣，墳則僅配黎氏。石馬始祖福士公，係善公玄孫也。吾所詳石馬移居別處者，河源百湖，由馬下遷去，花縣烏泥坪、橫壩風門凹，亦由石馬移去。七世叔祖再新公，移居博羅公莊。聖傳公子孫，遷居河源獺子墟。其餘遷居者，指不勝屈。但吾所未詳者，不敢妄述。今則舉吾所知者，聊述以補遺漏焉爾。（節錄民國十七年温氏十六世孫承龍字贊臣所作新序）。

*

*

*

我温氏世系，出自姬姓，唐叔虞之後。成王剪桐珪，封弟爲唐侯，及後晉大夫卻至，食采於温，居太原祁縣，爲郡著姓是也。溯遠胄，難以參考；紀近事，畧可據徵。稽之漢唐表傳，一脈相承，淵源長遠，忠烈勳業文章之盛，史不絕書。由宋以後，九郎公至良善公以下，著籍程鄉，及各州縣，稍爲詳晰，可考而知者也。

始祖九郎公，法名少九郎，宋時由江西石城縣下五里温坊檀樹下，移福建汀州府上杭縣中都古基。葬安鄉圳頭坪，乙兼辰，繡針落槽形。明萬曆戊子十一月二十九日未時重修，限清明日合祭。又上杭縣城南門內建立公祠，坐北，限八月二十五日合祭。妣管氏，葬永定溪南石琪坑摺灘，店背石碗

裏，亥山，仰天海螺形，限春分日合祭。生子五郎公，法名林五郎，由古基坑徙永定溪南雙井頭立業。塋溪南羅田背寨下，戌山，弓形彈子穴。明萬曆丙戌重修，清乾隆丙子十月復修。妣張氏，塋永定縣河頭城吳田背下，又名牛屎坪，甲兼卯，畫眉跳架形，乾隆庚午七月初三癸卯日亥時重修。生子五二公，法名五二郎。塋溪南石琪坑宏光寨下，坐西，明弘治八年重修，乾隆癸未六月十一寅時復修。妣李氏，塋河頭城石琪塘仙師宮水口牛炭棟赤鈞樹下，未兼丁，清乾隆乙丑四月十八日寅時重修。生子三：長六郎公、次大二郎公、三七郎公。伯祖六郎公，諱茂，字宗澤，由溪南雙井坊，移廣東梅縣松源橫岡下立業，伯祖大二郎公居來蘇古基坑。

七郎公，法名十七郎，塋楊梅洞溢洋坑，未山，伏地虎形。明崇禎己巳年、己巳月、己巳日、己巳時，重修，碑上鐫刻一世祖考。妣徐氏，伴葬夫墳，副室俞氏，塋楊梅洞探子窟近河墩上。生子十三郎公，塋官田楊家寨，巳山，將軍脫甲形。妣杜氏，塋將軍寨窩，辛山，美女照鏡形。清康熙壬午八月重修。生子四：長小一郎、次小二郎、三小三郎、四小四郎。伯祖小一郎之子安德，移居廣東長樂立業。叔祖小四郎，移居溪南立業。小三郎公，塋上杭縣石崇窠，坤山，天虹灌水形，又云竹篙趕羊形，清嘉慶丙寅八月十五日重修。妣黃氏，塋山峯岌大坐人形。生子小七郎，諱禧，字樂隱，又名隱德，塋上杭楊家寨右片，巳山。妣何氏，塋楊梅洞東街隔橋角裏，仙人觀棋形。續孫氏，往平遠韓坑探女，即歿。塋韓坑外甥顏貴面前，右片棟下、田心，坐東，右片空地，砌有石堆爲記。生五子：長

四六郎、諱宗理，次四七郎、三四八郎、諱宗興，四四九郎、諱宗明，五十四郎、諱宗慧。

四七郎公、諱宗慶，徙藍家渡霞化鄉，又云下壩鄉園下，立業。按公忠厚傳家，詩書啓後，輕財重義，樂善好施，庵背坪施庵一所，號曰安仁寺，庵內中堂，豎有檀越地主溫公四七郎神主一座，載入上杭縣志。墓霞化鄉園下，祠堂側，大塘面上，亥山，蜘蛛結網形。清乾隆戊午六月初六重修，同治六年又重修。妣范氏，伴葬夫墳，續李氏，葬羅灘坪，清嘉慶丙寅八月十六日重修。生八子：長良興、次良甫、三良欽、四良善、五良德、六良政、七良恭、八良彬。伯祖良興公，法名仲一郎。伯祖良甫公，法名仲二郎。伯祖良欽公，法名仲三郎，移居泉州。叔祖良德公，法名仲五郎，肇基上杭磔頭。叔祖良政公，法名仲六郎。叔祖良恭公，法名仲七郎。叔祖良彬公，法名仲八郎，移居廣東梅縣金盤堡小莆。

良善公、法名仲四郎，諱德安，明時由上杭藍家渡霞化鄉，移居廣東梅縣石坑開基。迨耄年回籍，葬霞化鄉側拳坪，庚申山。清道光戊申，善公裔孫，建造公祠於藍家渡側拳坪下，申兼庚。清道光丙寅工竣，十一月二十八丙申日辰時，奉公爐牌登龕。石坑後裔，又鐫善公名字於子千公墳碑上。清嘉慶甲子，合族建宗祠於梅縣城、南門內，坐北向南。限九月初一日，肇基公、六郎公、隱德公、伯三公、良善公，五房裔孫合祭，初三日，良善公子孫合祭。妣黎氏，合葬夫墳，清道光己酉重修。續范氏，葬興邑石馬上莊堡林屋岡下，戌山，烏鴉落陽形，又立銜葬大坪，赤水鯉魚形。生五子：長

子梁、次子千、三子貞、四子敏、五子俊。伯祖子梁公，原名子良，法名三十七郎，又名千一郎。叔祖子貞公，原名子聰，號德山，法名千三郎。叔祖子敏公，號千四郎。叔祖子俊公，原名伯俊，字廷旭，號五十九郎，由上杭移居興邑雙頭堡西埔立業。

子千公，字五十六郎，法名千二郎，肇基石坑，立業。清咸豐乙卯，公裔孫等，買受七硃鄉大塘肚粵光公屋，建造子千公祠兩棟，左右副屋，甲山，限清明日合祭。清光緒壬辰，公裔孫等捐費重修，換作辰兼乙。葬李坑堡柯樹岡猴畚村，坤山，樹上掛蛇形，碑文兼鵠良善公名字，相傳白鶴仙師主葬。限春分日合祭，祭時要另辦果酌，祀白鶴仙師。清雍正戊戌八月初八寅時重修。妣黃氏，葬上杭，今既失落。續曾氏，葬高排神犁鈎塘，酉山，縮脚麒麟形。生子文創公，法名六十五郎，葬大坪堡黃沙嶂，辰山，赤水鶴形，清康熙庚寅四月初五重修。妣凌氏，葬李坑堡布上墩下，乾山，猛虎跳牆形，清康熙戊子八月初十重修。生子仲和，法名七十二郎，葬中心神犁鈎塘，酉山，兼庚，昴宿六度，縮脚麒麟形，清道光壬寅重修。墳下古墓一穴，每年隨公并祀。妣王氏，葬長埔，乙兼辰，觀音坐蓮形，清雍正甲辰九月初九日重修。生四子：長志聰、次裔聰、三祖聰、四光聰。叔祖裔聰公，法名八十二郎，移居松口。叔祖祖聰公，諱三槐，移居興邑雙頭西埔。叔祖光聰公，法名八十四郎，移居龍川平越約桐木雙。

志聰公，法名八十一郎，葬興邑北廂黃陂鄉文瀾岡，艮山，風吹羅帶形。清康熙戊子九月初九日重

修。妣李氏，葬梅縣大乍堡河唇，又用銀牌，刻李氏，葬大坪堡，赤水鯉魚形。續吳氏，葬龍虎墟西凹，烏鴉落陽形，未山，清康熙辛卯五月重修。生子四：長法優、次法禎、三法璋、四法養。伯祖法優公，諱德優，號受富。伯祖法禎公，原名法振，其裔孫移居均田、江西等處。伯祖法璋公，其裔孫移居鎮平、平遠等處。法養公、號福士，遷于興甯石馬開基。上溯九郎公傳至福士公，既十四世矣。我族之流傳衍派，謹錄於此，便後人參攷焉。（錄卷首溫氏十五世孫頌庭撰溫氏族源）。

上杭溫氏族譜

上杭溫家族譜一冊，民國十一年香港荷李活道永昌印刷號排印，蓋即永昌號創辦人溫燦喜之子姪輩所「撮印」。其譜雖僅爲自上杭遷居南海西樵再遷香港即溫燦喜一家之房譜，然其所記上世源流與遷居別地之事蹟，亦多與東江各地溫氏之源流可互證者，茲摘錄其有關史實如次。又此譜原題「福建溫氏族譜」，今以其本以上杭一派溫氏爲重心，故權稱之曰上杭溫氏族譜焉。民國五十二年十二月二日，編者識。

太始祖銅寶公，生於唐僖宗之時，原居福建寧化石壁鄉，因遭黃巢之亂，遊於石城縣居住。祖妣童氏安人，生九子：長子移居寧都縣，二、三、四子，俱仍在石城縣原居，五子移居廣東程鄉縣永和墟，六、七子，移居廣東永安縣中心墟，八、九子，移居福建汀州上杭縣，吾祖九郎公，是第九房也。

始祖考九郎公，殆宋朝之民，（按爲宋初），賦性純良，寬仁厚義，於趙宋太祖定天下，因爲商，至福建上杭縣寬安鄉洪山堂，看其村鄉遂意，故居住於此，後竟爲洪庵寬安鄉之福地也。葬在安鄉坪，坐東向西，乙山兼辰，綉針落槽形。……始祖妣管氏十娘，葬於永定摺灘店背崗山上，仰天海螺形。

二世祖考五郎公，在安鄉居住。時遇王察院在樓下經過，我祖時年幼，在樓上戲耍，失落柴棍，打破轎角，恐此兄弟逃散。吾祖五郎公，更姓林，同母避居於永定縣溪南雙井邊住焉。葬於永定庵前羅田背寨下，庚山甲向，弓形彈子穴。……二世祖妣張氏三娘，葬在河頭城石琪塘。……

三世祖考五郎公，轉本姓溫，（按與二世五郎同名，殆以復姓關係），葬於永定溪南畚坊。……三世祖妣李氏九娘，葬於永定吳田背水口社山裏。……生四子：長、十五郎，移居在廣東翁源縣，後有子孫移轉於峯市水湄鄉；次、十六郎，移住上杭古箕坑，并廣東松源橫江下；三、十七郎，即是吾祖也；四、十八郎，移居廣東潮州揭陽縣馬路寨。

四世祖考十七郎，碑上書寫是七郎公也。移在楊梅洞中峽居住，葬在楊梅洞隘洋坑崗上。……四世祖妣俞氏八娘，未育早逝。……四世祖妣徐氏七娘，葬於溪南石坑灣裏，今地名井子頭。……生一子，是千三郎也。

五世祖考千三郎，葬在官田坪入去楊家寨，北向，將軍脫甲形。五世祖妣杜氏十娘，葬在蔡坑將軍寨窩裏。……生四子：長子小一郎，妣歐氏，生子德安，移居廣東長樂縣居住；次子小二郎，妣俞

氏，生長子小八郎，妣邱氏，移在上杭曹田住，次子三八郎，妣李氏，生四子；三子小三郎，是吾祖也；四子小四郎，妣黃氏，移在永安縣溪南居住。

六世祖考小三郎公，葬於楊梅洞口石崇窩裏。……六世祖妣黃氏三娘，葬於楊梅洞三友峯。……

七世祖考小七郎公，葬在官田坪入去楊家寨。……七世祖妣何氏八娘，葬於楊梅洞東衙隔橋角，

仙人看棋形。……生三子：長房四六郎、妣巫氏，生五子；……二房是吾祖四七郎公；三房四八

郎、妣藍氏，生三子：長子念一郎，妣何氏，移廣東興寧十三都，次子念二郎，妣范氏，三子四九郎，妣曾氏。

*

*

*

八世祖考四七郎公，富蓋楊梅洞，家財數萬餘。所嫌地窄人稠，不遂其意，因觀藍家渡勝運三圖梅永鄉，風景甚美，故買地埔一塊，在庵背坪河壩上，遂移居此地焉。生平積德公平，夫妻偕老，曾造一寺，施於僧人，名安仁寺。……八世祖妣范氏孺人，合葬於藍家渡。……八世副祖妣李氏孺人，葬於羅潭坪炭子窟。……范氏生七子：長子良興、妣賴氏；二子良甫、妣鄭氏；三子良欽、妣李氏，移居泉州無頭市，（子孫）亦有居上杭城（者）；四子良善、妣黎氏、范氏；五子良德、妣陳氏；六子良政、是吾祖也；七子良恭、妣劉氏，其子孫有在藍家渡住，有在上杭城者。李氏生一子，良彬，妣危氏，移在廣東嘉應州小莆園，伯振淳慶等是也。……

九世祖考良政公，傳說因開大水圳蔭田，犯傷人命，水未到田，被人告發，充軍到山東省，子孫亦蕃衍，原鄉無金骸，所葬是銀牌。生下四子，自往山東另配，又發一枝子孫。……

十一世祖考伯一郎公，有稱井頭村開基祖也。原居藍家渡大園裏，因遊玩至來蘇里下都泮境鄉，見其風清俗美，山叢水秀，故遂意，又開基於此，永遠創業，村名曰井頭。十一世祖張太孺人，合葬在本鄉南山下廖屋下手。……生子，仲一郎公也。……

十七世祖考念椿公，葬在黃坊，坐東向西，蛇形，至乾隆庚子年更葬。十七世祖妣廖太孺人，葬在上田梓青塘崗。……十七世祖妣張太孺人，葬在松源灣下陳屋後龍山。……共生六子，廖氏生長房法聰、妣張氏、何氏，裔即突元迪康父子；二房法性、字見我，妣廖氏，裔惟習、日餘、誕登、先登；四房法智、妣劉氏、張氏，裔朝英、順華父子；張氏生三房法廣、字養成，妣邱氏，裔振坤、振堦，住上杭城；五房法魯、字宗一公，是吾祖也；六房法政、字中性，妣何氏，裔輝遠，移去江西萬載縣。……

二十四世祖考乾魁公，做染布生意，三十四立室，於七十一歲仙遊，葬於廣東西樵竹逕孔崗。……
……二十四世祖妣梁安人，十六歲入門，於八十二歲仙遊，葬於廣東西樵竹逕孔崗。……生子：……
長少亡；二龍喜、妣梁氏，無嗣，去世於外埠架哩吉打埠；三少亡；四民喜，葬於西樵竹逕孔崗；五

少亡；六敬喜，別字謙山，妣韓氏，同葬丹灶沙崗；七燦喜，號傑生，……妣黃氏安人；八鳳喜，去世於外埠晏公埠。

二十五世祖考燦喜公，于三十六歲受室，在香港代理影相，及油畫鏡架生意。生於咸豐二年癸丑年十月十九夜子時，卒於民國九年五月十二日寅時，葬於香港鷄籠灣，石碑號碼▷字第一萬一千零六十一號。……二十五世妣黃安人，十九歲入門。生八子：……二子先留、三子先齡。……

按廣東大埔縣溫氏，亦自上杭藍家渡所遷出。余於民國十九年、始事徵集客家史料，大埔溫丹銘先生廷敬，自汕頭復書，即曾提及大埔溫氏源流，及其他與客家有關史實。略謂：「林仁兄台鑒：穗垣歸，得讀尊函，忻悉編校客家史料。將來必能搜求完備，以成信史，爲頌。……韶州張族，來自隋時，欽廉客家，始於五代，南、韶、連，皆係客族，張曲江子孫，亦說客話，茲皆證實，謹以奉聞。敵族遷敵縣後，歷代寒微，所記譜牒，不過鈔錄祖名，未成著述。惟僅知其出自上杭蘭家渡，（按即藍家渡），上杭復出寧化石壁，如斯而已。上杭族譜、幼時曾見，惟遭匪亂，亦未知有存否？……」云云。

